



INTRODUCZIUN

DAD ANDRI CASANOVA

Paulus drezza ses plaids en emprema lingia als fideivels da Corint. Leu vivan Gadius e Grecs. Ils Grecs numna el era pagauns. Igl ei plitost glied ord las classas socialas inferiuras, ed a quella glied annunzia Paulus ed ils ses il Cristus sco crucifigau e buc sco grond victur.

Cuntrari a quei ch'ils Gadius e Grecs pon tertgar, postulescha Paulus quei sco fermezia e sabientscha. Igl ei pia buc enzatgei fleivel e tup ch'il Salvader ei vegnius mess vid la crusch, anzi, quei fa part d'in midament radical che aulza ils sbassai e pigns. Quei suonda il patratg dalla semeglia cul garnetsch da senav (cf. Mt 13,31–32).

Aschia gi Paulus als fideivels da Corint ed a quels che vulan udir: Sche vus suandeis Cristus e carteis en el, veis vus tutta raschun da far quei cun perschuasiun e detschartadad, pertgei leu anfleis vus forza e sabientscha divina.

1. LECZIUN

1 Cor 1,22–25

Ils Gadius garegian miraclas ed ils Grecs tschercan sabientscha. Nus denton perdeghein Cristus, il crucifigau: In scandal pils Gadius ed in'ortgadad pils pagauns°; mo a quels ch'ei clamai, ton a Gadius sco Grecs, annunziein nus Cristus sco forza da Diu e sco sabientscha da Diu.

° ils Grecs cun lur dieus

Pertgei l'ortgadad da Diu ei pli sabia ch'ils carstgauns, e la fleivlezia da Diu ei pli ferma ch'ils carstgauns.